

雅堂书库

# 中国全史

第二部

## 《中国野史》

中国野史

# 皇明异典述

(明)王世贞 著

## 目 录

序 .....	1
卷一 .....	3
卷二 .....	20
卷三 .....	40
卷四 .....	60
卷五 .....	79
卷六 .....	97
卷七 .....	115
卷八 .....	133
卷九 .....	151
卷十 .....	165

## 序

夫国之有典也，则号令庆罚皆在焉。其曰典者何？志常也。曰异典者何？志非常也。诸创国者皆不为常者也。其业可大而法可久，习之则为常，是故曰典也。自古有天下之盛者，莫过唐、虞、三代。唐有天下，举亩{亩厶}之鰥民而委之政，既得政则继天子之所，任岳牧侯伯而僇之。既僇之而复峻用其子，其后辄举祖宗之人民社稷而付之。商有天下，举五就之遁臣而委之政，既托孤而废其主，废而旋复焉，尊之曰阿衡，而待之以不臣。周借其国，付渭川之钓叟，使埽父称而师事之，又以其幼子托之於介弟，使据君位而朝诸侯。其歿也，又崇以天子之礼乐。典而异者孰并哉！及其衰也，以定王却楚之晋文尚能守空名之隧，而不肯予以九合诸侯之齐桓，其相国尚能守陪臣之分而不敢渝。非衰主之贤而创主之易也，其势殊也。明兴，高帝取天下於腥秽之虜，势不得不有所更革，天造草昧，事取意裁，及未讨论，至末年而始截如矣，其始不能无异也。虽然异而非异也，易世而后，或革或因，乘时变通，加以润色，固无论已。其它或不无一时之好而有所登进，或不考於甲令之旧而有所抵牾，或饰喜出於燕昵而少折衷，或疑功归之惟重而未为衡，或假无方之立而不必公，或取政府之徇而不必当，或言路启於新进而无暇详，或曹局迫於奉行而不暇执。主之者快，而旁睹者骇；授之者以为常，而受之者以为异也。余故识而述

之。其有抑斥者，亦附焉。凡十卷，以从异日稗官之后。

## 卷一

### 再上祖宗号

嘉靖十八年，改上太宗体天弘道高明广运圣武神功纯仁至孝文皇帝尊号为成祖启天弘道高明肇运圣武神功纯仁至孝文皇帝，加上皇考恭睿渊仁宽穆纯圣献皇帝尊号为睿宗知天守道洪德渊仁宽穆纯圣恭俭敬文献皇帝。按：世宗欲罢太宗之配天，而宗祀献皇於明堂以配上帝，故有所更置耳。

### 天子别号

正德五年，上自号大庆法王西天觉道圆明自在大定慧佛，特给黄金印、白玉轴头诰命。嘉靖三十五年，恩封睿宗为三大金阙无上玉堂都仙法主玄元道德哲慧至尊开真仁化大帝，献皇后为三天金阙无上玉堂总仙法主玄元道德哲慧圣母慈化天后孝烈方皇后为九天金阙玉堂辅圣天后掌仙妙化元君，上初封灵霄上清统雷元阳妙一飞玄真君，加封九天弘教普济生灵掌阴阳功过大道思仁紫极仙翁一阳真人元虚玄应开化伏魔忠孝帝君，再加太上大罗天仙紫极长生圣智昭灵统三元证应玉虚总掌五雷大真人玄都境万寿帝君。自是至四十五年，又不可胜纪矣。

## 天子爵封

离皇帝初渡江下太平，称行中书省马步水军大元帅，下建业，称江南等处行中书省中书右丞相、吴国公，寻进吴王。皆诸将推，而以宋龙凤主命行之也。

正德十三年七月，司礼监太监萧敬传奉圣旨：“近年以来，虏酋犯顺，屡害四方，兵戎废弛。其辽东、宣府、大同、延绥、陕西、宁夏、甘肃，尤为要任。今特命总督军务、威武大将军、总兵官朱寿统率六师，分布人马，或攻或守，即写各地方制敕与之，使其必扫腥膻，靖安民物。至於河南、山西东、北直隶，倘有小寇，亦各与敕书，使率各路人马剪削。”朱寿者，上所自命名也。寻如内阁、九卿、科道官於左顺门谕旨，皆泣谏，弗纳。八月，手敕吏部：“总督军务、威武大将军、总兵官朱寿，统领六师，扫除边患，累建奇功，特加封镇国公，岁支禄米五千石。吏部如敕谕奉行。”该尚书陆完等执奏，不听，仍批注于后军都督府带俸。十四年正月，手敕吏部：“镇国公朱寿特加太师。”又传旨谕吏部：“总督军务、威武大将军、太师、镇国公朱寿，今往南北两直隶、山东泰安州等处尊奉圣像，供献香帛，祈福安民。”内阁、部院、科道、部属官极谏，不听。八月，传旨：“宁王宸濠，悖逆天道，谋为不轨，擅杀巡抚等官，烧毁府、县，荼毒生灵。传闻已至湖口，将犯南京。即令总督军务、威武大将军、总兵官、后军都督府、太师、镇国公朱寿，亲统各镇官军征剿。”又传旨：“联亲率六师，春天征讨，仍托总督军务、威武大将军、镇国公名号，还写制敕，

便於行事。”

### 三祖爵封

高皇帝之曾祖四九公，宋龙凤九年赠资德大夫、江南等处行中书省右丞、上护军、司空、吴国公，是曰懿祖，配侯氏赠公夫人；祖初一公，赠光禄大夫、江南等处行中书省平章政事、柱国、司徒、吴国公，是曰熙祖，配王氏赠公夫人；父五四公，讳世珍，赠开府仪同三司、上柱国、录军国重事、中书右丞相、太尉、吴国公，是曰仁祖，配陈氏赠公夫人。岂诸将臣上之而以宋龙凤之制行之耶？抑龙凤主来见策也？

### 两宫并尊

宪宗初，嫡母钱上徽号曰慈懿皇太后，生母周曰皇太后。钱太后崩，周太后始有圣慈仁寿之号。

正德中，母后张已上徽号曰慈寿皇太后矣。嘉靖初加尊号曰昭圣慈寿皇太后，称皇伯母，而圣母将称圣章皇太后。三年，加张太后尊号曰昭圣康惠慈寿，而蒋太后亦加号曰章圣慈仁，然尚有二字异也。十五年，昭圣加“恭安”二字於“康惠”上，而“章圣”加“康靖贞寿”於“慈仁下，遂并加八字，无别矣。

隆庆六年，今上即位，上嫡母陈号曰仁圣皇太后，生母李号曰慈圣皇太后。而万历六年加“懿安”於“仁圣”上，加“

昭文”於“慈圣”上。十一年，仁圣复加“康靖”二字，慈圣亦加“明肃”二字。盖不惟等重无别，而字义之微亦微轩轻矣。

### 亲王赐道号

世宗末，赐徽王厚燭号忠孝一真人，辽王宪节号一真人，黄金印大於国宝。后皆追夺。

### 亲王将兵

国初，皇侄文正以总兵镇洪都，诸将悉听节制。后秦王征西虏，晋王、燕王征北虏，楚王、湘王征五开洞蛮，俱领敕为大将统兵，公侯皆听节制，有功。永乐元年初下京师，制高阳郡王高煦充征虏副将军，北平、开原诸卫及从征官军悉听节制。

### 亲王授官

国初，皇侄文正初为同佾书枢密院事，特拜大都督府大都督，秦王为宗人令，晋王、燕王为左右宗人正，周王、楚王为左右宗人，俱正一品。

### 诸王公主初定岁禄

九年，定诸王、公主岁供之数。亲王岁支米五万石，钞二万五千贯，锦四十匹，纁丝三百匹，纱罗各一百匹，绢五百匹，冬夏布各一千匹，绵二千两，盐二百引，茶一千斤，马匹草料月支五十匹；靖江王府岁米二万石，钞一万贯，余比亲王减半，马匹草料月支二十匹。公主，未受封者，岁支纁丝一十匹，纱一十匹，罗一十匹，绢三十匹，夏布三十匹，木棉布三十匹，绵二百两；已受封者，庄田一所，岁收粮一千五百石，钞二千贯。亲王子男夫受封者，岁支纁丝、罗绢、冬、夏布、绵同公主，女半之；男已封郡王者，岁米六千石，钞二千八百贯，锦十匹，纁丝五十匹，罗二十五匹，纱二十五匹，绢一百匹，夏布一百匹，木棉布一百匹，绵五百两，盐五十引，茶三百斤，马匹草料月支十匹；女已受封及嫁者，岁米一千石，钞一千四百贯。亲王世子岁赐同郡王。郡王之子袭封者，比始封郡王减半，郡王女、县主已嫁者，岁米五百石，钞五百贯。后至二十二年，以物力不给，更定为今制。自初封十王之外，未有沾被者。

### 亲王岁禄之异

亲五岁禄万石。考宣德元年，周王岁禄加至二万石，以太宗母弟也。汉、赵二王又加至各三万石，以太宗亲子也。若代王六千石，唐王五千石，韩王三千石，伊王、辽王二千石，岷王一千五百石，肃王一千石，则以边饷之不继，或多赐庄田、草场以益之，非有隆杀也。

### 亲王功赏之厚

宗王以贤德维藩，不当有战功，而高帝则独重之。洪武中，秦、晋、燕数北征有功，赏最重，楚、湘次之。其可考者，晋、燕二府赐钞各一百万锭；楚王征云南阿鲁秃等处，赐秦马三千匹，黄牛二千头，牦牛一千头，羊九千只。

永乐赏谷王穗金川门功，乐七奏，卫士三百，金银大剑，金三百两，银三千两，钞三万锭，彩币三百匹，良马四匹，金笼鞍辔二副；又马二十四匹，金鞍二副，银五百两，钞四万六千锭，锦十匹，绉丝绫罗各六十匹，绢百九十匹，又银千两、钞三万锭，袍衣三袭，绢五百匹，白罗绵一条，西洋布三十匹、檀香三百斤，降真香五百斤，胡椒、苏木各千斤，良马十匹，羊百羸，酒五百瓶，椰子三百，火者百人。赏蜀王椿发谷府反谋功，黄金二百两，银千两，钞四万锭，玉带一，金织袞龙绉丝纱罗衣九袭，绉丝纱罗各五十匹，绒锦十匹，彩绢千匹，罗绵十条，高丽布一百匹，白米千石，胡椒千斤，良马十匹、金鞍二副；又银四千五百两、钞十万锭、米万石，绉丝五百匹，纱罗各二百五十匹，绢一千匹，罗绵六十条，苏木五千斤，胡椒三千斤，珍珠一百九十二两，马一百五匹，金鞍二副，火者百人。洪熙赏赵王高燧山陵功，白金三千两，钞三万贯，彩币二百表里，马十匹。

### 亲王诞辰特颁

永乐初，周定王橚诞辰，赐冠一，通天犀带一，彩币三十

匹，金香炉合各一，玉观音、金铜佛各一，钞八千锭，羊十腔，酒百瓶。立春，赐彩币三十匹，珠翠春花各四十枝，酒千瓶，羊百牵，马十匹，金鞍一副。按：我朝诸王於此二节例无庆赐，独定王以同母弟得之，至王薨而后已。盖特恩也。

### 亲王封国改建

洪武初，封吴王橚，改封周王；封豫王桂，改封代王；封汉王楹，改封肃王；封卫王植，改封辽王。

### 亲王降封

永乐中，徐王允 降封瓯宁王，奉懿文皇太子祀。

### 郡王同亲王

高皇之世，皇侄文正以大都督总制南昌，摧陈友谅，后虽用骄僭致殒，而念亲念勋，上实不忘。故其子守谦虽封郡王，冠止七旒，禄止二千石，而特设内外承奉、长史等官，宫城庄田宗社之类，皆与亲王等。

### 宗王献诗将赏

洪熙元年，韩王冲 或、襄陵王冲秋、乐平王冲杰各献诗颂，上叹而嘉之，赐敕奖谕，比之东平、河间。仍赏韩王白金五百两，钞六千锭，锦六匹，绉丝二十表里，纱罗各二十匹；二王各白金二百五十两，钞四千锭，锦三匹，绉丝十表里，纱罗各十匹。仍令户部加支本色禄米有差。祖宗朝亲亲右文，其隆渥如此。

### 夷王如亲王

西虜如忠义王，北虜如太平王、如和宁王，皆待之以王号，取羁縻而已。独永乐哈密忠顺王筑城池，赐金印，复设长史、纪善、卫经历，以中国庶僚周安、刘行、韦思诚充之，则俨然亲王矣。哈密累建累废，后为土鲁番所并。虽以诏旨还王及印，微弱不振，终难复也。

### 异姓追封王

国朝推刘氏白马之约，於勋戚大臣无生封王者，惟赠典则有之，今记於左：

滁阳王郭子兴以旧帅追封。杨王陈公以外大父追封，徐王马公以外父追封，俱无名。外高祖大王、外曾祖高王，俱无姓。陇西王李贞以姊夫及子文忠功追封。中山王徐达、开平王常遇春、歧阳王李文忠、宁河王邓愈、东瓯王汤和、黔宁王沐英、定远王沐晟、河间王张玉，定兴王张辅、东平王朱能、宣平王

朱永，以功追封。平阴王朱勇以死难追封。宁阳王张懋、定襄王朱希忠，以恩旧追封。

以上庙像用七旒冠皮弁及诰命用宝轴金册。宁阳、定襄后以言者追论非例见褫。

又洪武三年，大封勋臣，所谓生封公、死封王者，凡六人。其后李韩公善长、冯宋公胜皆以罪不得封。而封王者汤信公和、沐西平英也，沐定远晟、朱宣平永已不能无异议矣。朱平阴之死败绩，与丘淇公同，而得封王爵。至李陇西贞、张宁阳懋、朱定襄希忠，抑又异矣。

### 异姓封王

永乐末年，也先土干来归，赐姓名金忠，封忠勇王，奉朝请，其禄俸僉从，在公之下侯之上。然累加太保、太子太保等官，又在京及典兵出征，非四夷封爵比也。

### 赠三代王

洪武三年追封鄂国公遇春为开平王，十六年曹国公文忠为岐阳王，十八年魏国公达为中山王，二十五年西平侯英为黔宁王；俱追封其三代曾祖、祖、父为王。鄂、魏、曹以勋，西平兼以戚也。洪熙初，追封东平、河间亦三代王，后无之。

### 再进公号

吴元年，封中书左相国李善长宣国公，右相国徐达信国公。时上尚为吴王也。洪武三年，左丞相宣国公善长进封韩国公，禄四千石；右丞相信国公达进封魏国公，禄五千石。

再易侯号预章侯胡廷瑞改封临川侯。

### 父子易封

甲令袭封仍故号。常忠武遇春封鄂国公，薨，子茂袭，改封郑国公；茂得罪，弟昇改封开国公。邓武顺愈封卫国公，子镇袭，改封申国公。纳哈出降附，封海西侯，子察罕袭，改封沈阳侯。濮英赠金山侯，子琦改封西凉侯。

### 遥授国公

廖平章永安为张士诚所获，不屈，被囚，遥封楚国公。卒后改封郟，以避王封也。

### 恩泽公

高帝最重公封，下於王一等。其时独李曹公贞以尚主由恩亲侯进封，然与其子文忠同爵，不甚异也。至二十三年，都督佥事胡显以皇充妃从子侍楚王征蛮洞，功甚微，进封梁国，则甚异矣。永乐初，徐定公增寿以皇后弟输款被祸封，遂世袭。嘉靖初，张昌公鹤龄以太后兄推恩、郭翊公勋以督工进封，真阔异之典也。然昌、翊二国是流爵，非世袭。

### 袭爵公侯赠王公

袭爵公、侯、伯，非有奇功异能没不得追封王公侯，亦令甲也。宁阳王为英国公懋，平阴王为成国公勇，定襄王为成国公希忠。康蕲春铎之封蕲国，陈泰宁瀛之封宁国，宋西宁瑛之封郟国，吴恭顺瑾之封凉国，孙会昌继宗之封剡国，李忠宪贤之封丰国，蒋敏毅琬之封凉国，皆袭爵。内朱、陈、宋、吴四人，皆以死事，则宁阳、定襄，诚为旷典。而嗣侯得之，亦为异恩矣。

### 文臣封爵

按《大明律》：“文臣不许封公、侯。”又云：“其生前出将入相，能除大患尽忠报国者，同开国元勋一体封侯谥公，不拘此例。”“谥”当作“赠”，疑误也。按：称“封侯谥公”，又云“不拘此例”，则侯似可封；然所谓生前云云，恐亦追封也。国初自李韩公后不复见，成化中欲进封王越，亦以此例而止。

封公者，中书左丞相韩国公李善长以开国辅政功封。

封伯者，右丞相忠勤伯汪广洋以辅政封，御史中丞城意伯刘其以筹策封，广东左布政使东莞伯何真以降附封。

已上太祖时封，阶勋尚二品，而何公不言阶勋，顾岁禄至千五百石，已在一品上矣。

兵部尚书忠诚伯茹瑺以迎附封。

已上太宗时封，勋阶皆正一品矣。

兵部尚书靖远伯王骥以平麓川封，礼部尚书兴济伯杨善、华盖殿大学士武功伯徐有贞以夺门封。

已上英宗时封。

都察院左都御史威宁伯王越以破虏封。

已上宪宗时封。

南京兵部尚书新建伯王守仁以擒叛王封，真人恭诚伯陶仲文以修药饵封。

已上世宗时封。